

Minister Mike de Meza

Compania mester 1.5 biyon dollar pa Valero draai

ORANJESTAD – Den reunion cu Minister encarga cu asuntonan economico Mike de Meza a sostene cu San Nicolas Business Association (SNBA) riba e futuro di e refinaria, el a reacciona riba cartanan cu oposicion ta canando rond cu ne relaciona cu

refinaria. Minister de Meza a splica den e ultimo añanan a sa di distingui seriedad di interesadonan.

“Factornan cu a hala nos atencion di biaha ta cu nos a constata cu e compania no tabata registra ainda y e adres tabata di un oficina den un

edificio cu ta huur oficina na diferente compania”, e Minister a splica. Esaki ta cosnan cu ta lanta un “red flag” di biaha pasobra un compania cu ta opera refinaria of tin e capacidad pa opera un refinaria mester ta registra y por lo menos tin su mesun oficina, entre otro. E recurso-

nan financiero pa cumpra, pone den funcion y opera un refinaria ta core den varios biyon dollar.

Costo start up refinaria

Minister de Meza a duna como ehempel cu ta costa por lo menos 400 miyon dollar pa un barco di 4 miyon bari di producto cu ta dren-ta pa wordo refina. Esaki ta costo di e producto basico y nada mas. Pa start e refinaria bek a costa den pasado mas of menos 400 miyon dollar, cu e refinaria cera for di aña 2012, mester conta riba un suma hopi mas halto cu esey awendia. Pa converti e refinaria den uno cu por realmente competi den e mercado mester di por lo menos 1.5 biyon dollar di inversion den ekipo, Minister de Meza a splica. Den otro palabra, opera un

refinaria ta hopi mas costoso cu e prijs di benta di e facilidadnan. Ta hopi detaye tin di tene na cuenta ora cu ta presenta un cumprado.

Minister a keda satisfecho y contento di por a intercambia den un bon ambiente cu e representantenan di SNBA pa nan haya un idea di tur loke a tuma luga den e ultimo lunanan y por lo menos haya confirmacion riba potencial partner of cumprado pa Valero.

Na final di dia ta Valero ta esun responsabel dilanti di gobierno y comunidad di Aruba y nan a expresa na varios ocasion cu nan ta mantene nan mes na e responsabilidadnan y condicionnan cu nan a acorda na dje den nan contract cu Pais Aruba prome y riba cu tur cos. □